

2022-yil 1-iyul holatiga ko'ra,
O'zbekistonda:

Aholi:
35,6 mln. kishi

Ayollar:
17,7 mln. kishi

Erkaklar:
17,9 mln. kishi

8/p

YOSHLAR OVOZI

**BIZ – KELAJAK
BUNYODKORIMIZ!**

Ijtimoiy-siyosiy, iqtisodiy,
adabiy-badiiy
gazeta

51 (16504)
2022-yil, 30-iyul
shanba

[/yoshlarovozi](#)

[/yoshlarovozi](#)

[/yoshlarovozi.uz](#)

**Sharh
2-bet**


Imkoniyat

**Kun mavzusi
3-bet**

Baxtli mamlakatlar reytingida
nechanchi o'randamiz?

**Mutasaddilar diqqatiga!
6-bet**

Tozalik uchun
eng kam oylik



IT XIZMATLAR EKSPORTI 1 MILLIARD DOLLARGA YETKAZILADI

Prezident Shavkat Mirziyoyev Yuqorichirchiq tumanidagi
"Astrum" IT akademiyasida axborot texnologiyalari sohasi mutaxassislari,
yosh dasturchilar bilan uchrashdi.

batafsil
2-betda

IT XIZMATLAR EKSPORTI 1 MILLIARD DOLLARGA YETKAZILADI



Kecha Prezident Shavkat Mirziyoyev Yuqorichirchiq tumanidagi "Astrum" IT akademiyasiga tashrif buyurib, axborot texnologiyalari sohasi mutaxassislari, yosh dasturchilar, IT va kommunikatsiya kompaniyalarining rahbarlari va xodimlari bilan uchrashdi. Uchrashuvda mamlakatimiz IT sektoridagi ishlarning bugungi ahvoli va uni yanada rivojlantirish yuzasidan fikr almashildi.

Davlatimiz rahbarining ta'kidlashicha, ushbu sohaga so'nggi besh yilda 2 milliard dollar, shundan 700 million dollar to'g'ridan-to'g'ri investitsiyalar yo'naltirildi.

"Bundan uch yil oldin IT-parklar tashkil qilib, ularga alohida soliq rejimini joriy etdik. Buning hisobiga bugungi kunda IT-parklarda 14 ming nafar yoshlar yuqori daromadli ish joylari bilan ta'minlandi. Shu bilan birga, o'zini o'zi band qilgan IT mutaxassislari soni yil boshidan 2,5 barabarga o'sib, 43 mingga yetdi. Joriy yilning o'zida mamlakatimizda 134 ta yangi, jumladan, 50 ta xorijiy IT kompaniyalari tashkil etildi, eksportchi korxonalar soni esa 2 baravarga oshdi. So'nggi uch yilda mobil internet narxi 9 baravarga arzonlashdi va xalqaro reytingda 15-o'ringa ko'tarildi

(68-o'ringandan). IT xizmatlari hajmi va eksporti bir necha barabarga o'sdi. Eng asosiysi, IT kasblarni egallash yoshlar o'rtasida trendga aylandi", - dedi Prezidentimiz.

Davlatimiz rahbari uchrashuv chog'ida boshqa hududlarda ham bunday IT akademiyalar tashkil qilish istagida bo'lganlarning tashabbuslari har tomonlama qo'llab-quvvatlanishini, barcha masalalari hal qilib berilishini aytib o'tdi. Viloyat hokimlariga bir oy muddatda bu yerga kelib, barcha sharoit va imkoniyatlarni ko'zi bilan ko'rib, o'z hududida kamida 1 tadan shunday IT akademiya tashkil etish loyihasini boshlashga topshiriq berildi.

Kelgusi besh yilda mamlakatimiz IT xizmatlari eksporti 1 milliard dollarga yetkaziladi.

Uchrashuvda yoshlarni IT kasblarga o'qitishni to'g'ri yo'lga qo'yish, sifatli infratuzilma, kompyuter va kafolatli buyurtma bilan ta'minlash uchun 4 ta masalani hal etish lozimligi ko'rsatib o'tildi.

Xususan, internet qamrovi va sifatini keskin oshirish zarur. Hududlarni optik tolali tezkor mobil internet (4G) bilan qamrab olish darajasi 70 foiz atrofida. 118 ta qish-

loqqa internet ham, mobil aloqa ham kirib bormagan.

Bundan tashqari, IT sohasida iqtidorli yoshlarni aniqlash va qo'llab-quvvatlashni yanada ke-ngaytirish kerak. Bugungi kunda bunday yoshlarning startaplariga (230 ta) atigi 10 milliard so'm grant ajratilgan. Yoki kompyuter xaridi uchun 3,5 ming nafar yoshlarga kredit berilgan bo'lsa, kafli yo'qligi uchun 6,5 mingdan ziyod yoshlarga kredit berish rad etilgan.

Qoraqalpog'iston Respublikasi, Buxoro, Qashqadaryo, Surxondaryo, Namangan va Navoiy viloyatlarida esa IT-parklarni tashkil etish ishlari yakuniga yetkazilmagan.

"Siz, yoshlardan hamkasblaringiz, hamkorlaringiz, o'rtoqlaringizga shuni yetkazishlaringizni so'rayman. Davlat tomonidan IT sohasini jadal rivojlantirish bo'yicha kerak bo'ladigan barcha sharoit va imkoniyatlarni yaratamiz. O'zimizdan boshlab hamma rahbarlar sizlar bilan doimiy muloqotda bo'lamiz", - dedi Prezident uchrashuv yakunida.

Davlatimiz rahbari soha vakillari bilan ham ochiq fikr almashdi.

Prezident matbuot xizmati ma'lumotlari asosida tayyorlandi.

IMKONIYAT

Shahriza SATTOROVA,
"Yoshlar ovozi" muxbiri



Butunjahon nogironlik hisobotiga ko'ra, nogironlikning qaysidir guruhiga mansub bo'lganlar 1 milliarddan ziyodroq yoki dunyo aholisining 15 foizini tashkil etadi. Ularning 80 foizi esa rivojlanayotgan mamlakatlarda istiqomat qiladi. O'rtacha daromadli iqtisodga ega O'zbekistonda so'nggi 10 yil davomida nogironligi bor deb topilgan shaxslar 2-3 foizni tashkil etib kelmoqda.

Dunyoda imkoniyati cheklangan bo'lishiga qaramay, turli sohalarda ulkan cho'qqilarni zabt etgan insonlar kam emas, sportchi, rassom, san'atkor, hatto siyosiy yetakchi bo'lgan shaxslar ham talaygina. Jahon tarixiga na-

zar solsak, "sariq matbuot"ning asoschisi Jozef Pulitser ko'zi ojiz bo'lishiga qaramay, Kolumbiya universitetiga 2 million AQSh dollarini qoldirgan. Erik Vayxenmayer ham ko'zi ojiz bo'la turib Everest cho'qqisini zabt etgan dunyodagi birinchi qoyachi alpinist. Lui Brayl - fransuz tiflo-pedagogi. 1829-yilda ko'zi ojizlar uchun haligacha ishlatilib kelayotgan rel'ef - nuqtali Brayl shriftini ishlab chiqqan. Bu kabi misollarni sanasak, adog'i yo'q.

To'g'ri, hammasi avvalo insonning o'ziga bog'liq. Ammo hamma narsaning shakllanishi va rivojlanishi jamiyatdagi muhitning mevasi.

Yurtimizda mana shunday insonlar uchun qulay shart-sharoitlar, bepul va sifatli ta'lim olish uchun imkoniyatlar mavjud. Vazirlar Mahkamasining joriy yil 21-iyundagi qarori bilan tasdiqlangan nogironligi bo'lgan yoshlarga o'qish, yashash va transport xarajatlari qoplash uchun subsidiya ajratishning ma'muriy reglamentiga ko'ra, nogiron yoshlarga nodavlat ta'lim tashkilotlarida kasb-hunar, dasturlash, umumta'lim fanlari va xorijiy tillarni o'rgatish, zarur hollarda yashash va transport xarajatlari qoplash uchun BHMning 50 baravari (15 million so'm)gacha subsidiya ajratiladi.

O'qish xarajatlari uchun subsidiya olishda arizaga quyidagilar ilova qilinishi kerak:

- agar ariza bolaning qonuniy vakili tomonidan berilsa, uning shaxsiy identifikatsiya raqami va bolaning qonuniy vakili ekanligini tasdiqlovchi hujjat;
 - nodavlat ta'lim tashkiloti tomonidan ariza beruvchini o'qitish to'g'risida shartnomaning elektron nusxasi.
- Yashash va transport xarajatlari uchun subsidiya olishda:
- yo'l xarajatlari tasdiqlovchi hujjatlarning elektron nusxalari;
 - ijara shartnomasi va uning soliq organlarida hisobga qo'yilganligi haqidagi bildirishnomaning elektron nusxasi.

Davlat xizmati bepul ko'rsatilib, ariza 3 ish kunida ko'rib chiqiladi. Nodavlat ta'lim tashkiloti joylashgan hududdagi mahallaning yoshlar yetakchisi zimmasiga ariza beruvchining nodavlat ta'lim tashkilotida o'qishini joyiga chiqqan holda monitoring qilish vazifasi yuklatiladi.



SUBSIDIYA OLISH UCHUN ISTALGAN DAVLAT XIZMATLARI MARKAZIGA MUHOJAJAT QILINADI. ARIZALAR JORIY YIL UCHUN - 2022-YIL 1-AVGUSTDAN SHUNINGDEK, 2023-YILDAN BOSHLAB HAR YILI - 10-YANVARDAN QABUL QILINADI.

BAXTLI MAMLAKATLAR REYTINGIDA NECHANCHI O'RINDAMIZ?



Dunyo bo'yicha har yili turli yo'nalishlar bo'yicha davlatlar reytingi e'lon qilinadi. Bu mamlakatning imijini shakllantirishda muhim ahamiyat kasb etadi. Reytingda bir qator omillar e'tiborga olinadi. Masalan, tabiiy boyliklar, aholining yashash tarzidan

mamnunligi, korrupsion holatlar, so'z erkinligi, fuqarolarning to'kis hayoti ta'minlanishi va boshqalar. Xo'sh, yangi O'zbekiston nufuzli tashkilotlar tomonidan e'lon qilinayotgan shu kabi reytinglarda qanday o'rinlarni band qilmoqda?

"Gallup"ning an'anaviy "World Happiness Report – 2022" baxtlikni ko'rsatuvchi reytingida O'zbekiston 146 mamlakat orasida 53-o'rinni egalladi. Bu 2021-yilgi ko'rsatkichdan 11 pog'ona past. Shuningdek, O'zbekiston MDHga a'zo davlatlar orasida yetakchilikni boy bergan. Finlandiya reytingda besh yildan beri yetakchilik qilmoqda. U **eng baxtli davlat deb topilgan**. Keyingi o'rinlarni Daniya, Islandiya, Shvetsariya, Niderlandiya, Lyuksemburg, Shvetsiya, Norvegiya, Isroil va Yangi Zelandiya egallagan.

Shuningdek, "Chegarasiz reportyorlar" xalqaro nohukumat tashkiloti tomonidan tuziladigan So'z erkinligi indeksining 2022-yilgi reytingida O'zbekiston o'z ko'rsatkichlarini birdan 24 pozitsiyaga yaxshilab, 157-o'rindan 133-o'ringa ko'tarildi.

OZIQ-OVQAT XAVFSIZLIGI INDEKSI

Global oziq-ovqat xavfsizligi indeksining (The Global Food Security Index) o'ninchi nashri e'lon qilindi. O'zbekiston reytingda 113 ta davlat ichida 53,8 ball to'plab, 78-o'rinni egalladi. To'plangan ball O'zbekistonga oziq-ovqat xavfsizligi o'rtacha darajada bo'lgan davlatlar guruhida o'z o'rnini saqlab qolish imkonini bergan.

Global indeks oziq-ovqat xavfsizligi holatini to'rtta mezon bo'yicha tekshiradi: oziq-ovqat mavjudligi, miqdori, sifati va

xavfsizligi, tabiiy resurslarning xilma-xilligi va barqarorligi.

O'zbekiston oziq-ovqat mavjudligi bo'yicha 49,3 ball bilan 81-o'rinni, miqdori bo'yicha 51,3 ball bilan 76-o'rinni, sifati va xavfsizligi bo'yicha 65,1 ball bilan 60-o'rinni, tabiiy resurslarning xilma-xilligi va barqarorligi bo'yicha 55,4 ball bilan 30-o'rinni egallagan. Reytingda birinchi o'rinni 84 ball bilan Irlandiya, ikkinchi o'rinni 81,3 ball bilan Avstriya, uchinchi o'rinni 81 ball bilan Buyuk Britaniya, to'rtinchi o'rinni 80,9 ball bilan Finlandiya va beshinchi o'rinni 80,4 ball bilan Shvetsariya band qilgan.

RAQOBATBARDOSH SANOAT

Birlashgan Millatlar Tashkilotining Sanoatni rivojlantirish tashkiloti (UNIDO, Avstriya) tomonidan "Raqobatbardosh sanoat unumdorligi indeksi – 2022" hisoboti e'lon qilindi. Hisobotda O'zbekiston 154 mamlakat orasida 89-o'rinni egallagan va so'nggi hisobotga ko'ra, reytingda 5 pog'onaga ko'tarilib, bu indeks metodologiyasiga muvofiq, sanoat rivojlanishining o'rtacha kvintiliga ega mamlakatlar toifasiga o'tish imkoniyatini yaratadi. Mamlakatimizda amalga oshirilgan islohotlar natijasida, indeksning oxirgi hisobotiga ko'ra, O'zbekiston 8 ta indikaturning 6 tasida ijobiy o'zgarishlarni qayd etgan, shu bilan birga, 2 ta indikatorda pasaygan.

TOSHKENT DUNYODAGI ENG QIMMAT SHAHARLAR REYTINGIDA

"Numbeo" tadqiqot xizmati tahlilchilari dunyoning eng yirik shaharlarida yashash narxini hisoblab, bu bo'yicha reytingni e'lon qildi. Tadqiqotchilar reytingni tuzishda uy-joy ijarasi, oziq-ovqat va restoranlardagi narxlarni hisoblab chiqqan. Ro'yxatdan jami 510 ta shahar o'rin olgan, Bermud orollari poytaxti Hamilton birinchi o'rinda qayd etilgan.

O'zbekistondan faqat Toshkent shahri reytingga kiritilgan bo'lib, u 465-o'rinni egallagan. Yashash narxi bo'yicha Top-10 shaharlardagi aksariyat o'rinlarni Shvetsariya shaharlari egallagan. Rossiya shaharlari orasida Sankt-Peterburg 279-o'rin, Moskva 287-o'rin, Olmota va Nursulton (Qozog'iston) mos ravishda 466 va 475-o'rin, Bishkek (Qirg'iziston) 477-o'rindan joy olgan.

"Numbeo"ning jinoyatchilik darajasi bo'yicha mamlakatlar reytingida O'zbekiston 142 mamlakat ichida 104-o'rinda ko'rsatilgan. Mamlakat indeksi 33,68 ni tashkil qildi. Reytingga ko'ra, O'zbekistonning ko'rsatkichlari Belarus, Qirg'iziston, Qozog'iston, Rossiya va boshqa davlatlarga qaraganda yaxshiroq. Jinoyatchilikning eng yuqori darajasi Venesuela, Papua-Yangi Gvineya va Afg'onistonga to'g'ri kelmoqda. Jinoyatchilik eng past darajasi Qatarda.

O'ZBEKISTON TINCHLIKSEVARLIK GLOBAL INDEKSIDA YUQORILADI

"Global Peace Index – 2022" reytingida O'zbekiston 7 pog'onaga yuqorilab, 163 davlat orasida 86-o'rinni egalladi. Hisobotga ko'ra, O'zbekiston "Rossiya va Yevroosiyo" guruhida eng katta yaxshilanishni ko'rsatdi – 1,5 foiz.

Qo'shni mamlakatlar orasida Qozog'iston 97-o'rinda, Qirg'iziston 91-o'rinda, Tajikiston 92-o'rinda, Turkmaniston 104-o'rinda joylashgan. Eng tinchliksevar davlatlar deb Islandiya, Yangi Zelandiya va Irlandiya topildi. Indeksi eng past bo'lib turgan mamlakatlar: Afg'oniston, Yaman, Suriya, Rossiya va Janubiy Sudan.

Xalqaro reytinglardagi yaxshi natijalar mamlakatning investitsiyaviy jozibadorligini oshiradi. Sohalarga faol investitsiyalarning kirib kelishi esa shubhasiz mamlakat taraqqiyotiga xizmat qiladi. Ammo reytinglarda qanchalik yuqori o'rinlarda bo'lmaylik, muhimi, xalqaro hamjamiyat e'tirof etayotgan islohotlar amalda to'laqonli o'zini namoyon etmasa, bari befoyda. Axir qilinayotgan ishlar qandaydir reytinglarda yuqori natijalarni egallash uchun emas, avvala, vatandoshlarimizning turmush tarzini yaxshilashga qaratilgan bo'lishi kerak.

Shahrux SATTOROVA,
"Yoshlar ovozi" muxbiri

44-BUTUNJAHON SHAXMAT OLIMPIADASIDAN DASTLABKI G'ALABA



Kecha Hindistonning Chennai shahrida 44-Butunjahon shaxmat olimpiadasiga start berildi. Dastlabki kun bahslarida O'zbekiston erkaklar terma jamoasi Nepal terma jamoasiga qarshi bahs olib bordi. Ayollar terma jamoasi esa musobaqani Ganaga qarshi o'yin bilan boshladi.

Birinchi turda erkaklar terma jamoasi – Nodirbek Abdusattorov, Nodirbek Yakubov, Javohir Sindarov va Shamsiddin Vohidov nepallik raqiblari ustidan; ayollar terma ja-

moamiz – Umida Omonova, Afruza Hamdamova, Maftuna Bobomurodova va Marjona Malikova ganalik raqiblari ustidan g'alaba qozondi.

O'zbekiston – Nepal 4:0 (erkaklar)

O'zbekiston – Gana 4:0 (ayollar).

@alisher_sadullaev
telegram kanalidan olingan

BEPUL TO'GARAK TASHKIL ETDIM



Jahongir ISROILOV,
Farg'ona shahridagi
"Gulzor" mahalla yoshlar yetakchisi



“

ENG KO'P MUROJAAT
INGLIZ TILI VA IT SOHALARIDA
TO'GARAK TASHKIL ETISH
BORASIDA
BO'LDI.

Yoshligimdan kitob o'qishga qiziqaman. Mahallada yoshlar yetakchisi sifatida yoshlarni kitobxonlikka jalb qilish asosiy vazifalarimdan biri deb hisoblayman. Shu maqsadda nafaqat "Gulzor" mahallasi yoshlari, balki butun O'zbekiston miqyosida yoshlarni kitob o'qishga qiziqtirish yo'lini izladim.

Bir kuni kitob o'qishga qiziqishimni bilgan bir hamkasbim xarid qilgan yangi kitobini menga olib kelib, uni o'qishga qiyinalayotganini, o'qishdan zerikib qolayotganini aytdi. Men unga bu kitobning qisqacha mazmunini tushuntirib berdim. Bu Djeym Klirning "Atom odatlar" degan kitobi edi. Oradan bir hafta vaqt o'tib, hamkasbim bu kitobni o'qib tugatganini aytdi.

Agar yetakchini shu yo'l bilan kitob o'qishga qiziqтира olgan bo'lsam, yoshlar orasida ham shunday yo'l tutsa bo'ladi, degan fikrga keldim. Axborot texnologiyalaridan samarali foydalana olganim uchun bir qancha badiiy kitoblar haqida qisqacha roliklar tayyorlay boshladim. Bu borada men uchun muammo tug'ilmadi. Bo'sh vaqtlarimda 3 ta kitobga retsenziya tayyorladim. Hozirgi vaqtda Abdulla Qodiriyning "Mehrobdan chayon" asariga retsenziya tayyorlayapman.

Kitoblar haqidagi lavhalarini mahallamizning telegram kanaliga uzatdim. Lavhani ko'rgan yoshlar bu kitoblarni topib berishimni so'rab keldi. Men esa navbatma-navbat kitoblarni topib berdim. Shu tariqa yoshlarning kitob o'qishga qiziqishini oshirib bormoqdaman. Hattoki qo'shni mahalla yoshlari ham kitob so'rab murojaat qilishmoqda. Ularga ham imkonim boricha yordam berayapman.

O'QUV KURSILARI FAOLIYAT BOSHLAGI

Xatlov jarayonida mahallamiz yoshlarining istaklarini so'rab, surushtirganimda eng ko'p murojaat ingliz tili va IT sohalarida to'garak tashkil etish borasida bo'ldi. Shunday markazlar ochishdan avval mahallada kam ta'minlangan oilalar bilan tanishib chiqdim. Bu oilalarda har bir farzandi uchun 400 ming so'mdan to'garak chiqimlarini qoplash uchun mablag' zarurligini aniqladim. Shuning uchun mahallamiz hududida joylashgan maktab binosida ingliz tili va IT sohalaridan bepul to'garak tashkil etdim. Bir oz vaqt o'tib, o'quvchilar soni ko'paydi.

Farg'ona shahri yetakchilarida ham ushbu loyihaga qiziqish oshib, hududlaridagi kam ta'minlangan oilalar farzandlarini tavsiyanoma asosida yubora boshladi. O'quvchilarning soni 80 nafarga yetganda loyihani kengaytirish haqida o'ylab, volontyorlar jamoasiga taklif bilan murojaat qildim. Hozir shahar bo'ylab 12 ta o'quv markazida 150 nafardan ortiq yoshlar, kam ta'minlangan oilalar farzandlari ta'lim olmoqda.

O'QUVCHI TARTIBGA SOLINDI

Mahalladagi yoshlar orasida jinoyatchilikning oldini olish maqsadida mahallamiz hududida joylashgan 25-maktabda profilaktika inspektori va maktab psixologi bilan tez-tez rey-

lar tashkilashtirib turamiz. Shunday reydlarning birida 8-sinf o'quvchisining ichki cho'ntagidan sovuq qurol topildi. Mahallamizda istiqomat qiladigan bu yigitning ota-onasiga vaziyatni tushuntirdik. Ularning so'ziga ko'ra, farzandining tarbiyasi juda og'ir, biror tanbehni olmas, har bir gapga qarshilik qilar ekan. Ota-onasi roziligi bilan uni o'z nazoratimga oldim. Uni ingliz tili va IT sohasidagi to'garaklarga birlashtirib, darslarga qatnashishini nazorat qildim. Bir-ikki marta qarshilik ham qildi. Vaqt o'tib hamma shartlarimizni bajara boshladi. Shu tariqa maktabdagi yurish-turishi butunlay o'zgardi. Buni maktab o'qituvchilari ham ta'kidladi. Hozir maktabdan ta'tilga chiqqan o'quvchi to'garaklarga qatnayapti. Uning onasi farzandi juda o'zgarганиni, bo'sh vaqtda dars bilan shug'ullanayotganini bildirib, rahmat aytdi.

31 TA YANGI ISH O'RNI YARATILADI

Mahallamizdagi aksariyat xonadonlar ko'p qavatli uylardan iboratligi bois yoshlarga ish o'rinlari yaratish biroz mushkul vazifa. Shuning uchun "Moturudiy 62" ko'p qavatli uyning yerto'lasini ijaraga oldim. Hozir u yerda ta'mirlash ishlari olib borilmoqda. Yerto'lada mahallamiz yoshlari, xotin-qizlari uchun 31 ta ish o'rne yaratish niyatimiz bor. Jumladan, tikuvchilik, sartaroshlik, manikyur va pedikyur bo'yicha yangi ish o'rinlari ochilishi kutilmoqda. Qolgan 3 ta xonani mahalla yoshlari uchun "Zakovat", kutubxona, shaxmat va shaxka xonasi uchun ajratib, ta'mirlaymiz.

Maqsadlarimga erishish uchun doim izlanishdaman. Bu lavozimda faoliyat olib borayotgan kishi, avvalo, halol va kamtar bo'lishi lozim. Halollik ichki sokinlik va xotirjamlikka yetaklaydi. O'z ustimda ishlash esa intellektual rivojlanishga olib keladi. Bunda esa menga ko'proq kitob o'qish yordam beradi. Hamkasblarimga ham shuni tavsiya etaman.

NAVBAHORLIK YOSHLAR 1-O'RINI EGALLADI



Mahalla yoshlari o'rtasida "Charm to'p" an'anaviy futbol musobaqasining Navoiy viloyati bosqichi bo'lib o'tdi.

Navoiy shahridagi viloyat futbol akademiyasining "Kimyogar" o'quv-mashg'ulot bazasi hamda Karmana tumaniidagi "Yoshlik" o'yingohida o'tkazilgan musobaqalar qizg'in va murosasiz kurashlarga boy bo'ldi. Yakuniy natijalarga ko'ra, Navbahor tumani jamoasi 1-o'rinni egalladi. 2-o'rinni Karmana tumani, 3-o'rinni G'ozg'on shahri jamoasi qo'lga kiritdi.

G'olib jamoa va sovrindorlar medal, diplom va esdalik sovg'alar bilan taqdirlandi.

Muhammadshukur MUHAMMADJONOV,
"Yoshlar ovozi" muxbiri

G'ALABA NASHIDASI



Kumushxon O'RINBOYEVA,
"Besh tashabbus olimpiadasi"
g'olibi

Sportda muvaffaqiyatga erishish insondan sabr-toqat, metin iroda talab etadi. Lekin mashaqqatlardan cho'chimay, murabbiy ko'rsatmasiga amal qilib, maqsad va mara sari dadil qadam tashlagan har bir sportchi, albatta, g'alaba qozonadi. Buning uchun u ham jismonan, ham ruhan tayyor bo'lishi kerak.

Oilada ikkinchi farzandman. Bolaligim juda qiziqarli o'tgan: musiqa, sport to'garaklariga qatnashardim. Akam yengil atletika bilan shug'ullanishni boshlagach men ham u bilan birga mashg'ulotlarga qatnadim. Ota-onam qiziqishlarimizga qarshi bo'lmagan, aksincha, doim sharoit yaratib berishgan.

Dastlab maktabimizda Dong'ara bolalar va o'smirlar sport maktabi murabbiysi D.O'rinboyev rahbarligida tashkil etilgan basketbol to'garagiga qatnashdim. Yugurish sporti ham men uchun qiziq edi, lekin bunda natijaga erishishga unchalik ishonmas edim. Qiyinchiliklar sabab sportdan ketishga ham qaror qilganman, biroq ustozimning menga ishonchi yana sportga qaytardi.

Har bir musobaqaga chiqishdan oldin "Hammaning e'tibori menda turibdi, bu yerda o'zingni ko'rsatmasang, qachon ko'rsatasan, bugun sen g'alaba qozonishing, medal olib seni kuzatayotganlarni xursand qilishing kerak", - deb ruhiyatimni ko'tarishga harakat qilganman.

Xorazm viloyatida "Besh tashabbus olimpiadasi" doirasida o'tkazilgan yengil atletika turi bo'yicha respublika final bosqichida 1-o'rinni qo'lga kiritdim.



"O'ZBEK MODELI"NI YARATAMAN

Yagona maqsadimiz - yangi O'zbekistonning buguni va kelajagi barqaror bo'lishi, xalqimizning farovon hayotini ta'minlash borasida birlashib, qo'lni qo'lga berib harakat qilishdir. Bu yo'lda yoshlarimiz ham katta kuch bo'lib intilishmoqda. Ana shunday yoshlardan biri - "Mard o'g'lon" davlat mukofoti sohibi Xojiakbar Muhammadjonov.

- 23 yoshni qarshiladim. Axborot texnologiyalari sohasida respublika va xalqaro yutuqlarga erishib kelyapman. Yangi O'zbekistonning yangi taraqqiyot poydevorini barpo etishda qalbimdagi shijoat, yuragimdagi g'urur bilan tengdoshlarimga namuna bo'lishga harakat qilaman. Eng oliy maqsadim - texnologiya va avtomatlashtirish sohasida "O'zbek modeli"ni yaratish, - deydi qahramonimiz.


Xojiakbar O'zbekiston Xalqaro islom akademiyasining Axborot xavfsizligini boshqarish mutaxassisligi 1-bosqich magistranti. Beruniy nomidagi davlat stipendiyasi hamda Axborot texnologiyalari va kommunikatsiyalarini rivojlantirish vazirligi stipendiyasini qo'lga kiritgan. 2020-yilda "Yil talabasi - 2020" ko'rik-tanlovining "Yil-

ning o'z sohasi bo'yicha eng bilimdon talabasi" yo'nalishi g'olibi. Ayni damda ilmiy ishlar, innovatsion g'oyalari, loyihalar, ixtirolar, robototexnik ishlanmalar hamda dasturlash yo'nalishlarida yangi tashabbuslar ustida ish olib bormoqda. Ilim-fan nazariyasi, texnologik yechimlar, avtomatlashtirish mavzularida ilmiy ishlar, tezis va maqolalari respublika va xalqaro nashrlarda chop etilgan.

Germaniyada "Development of tin tuck to the terminal or tin filling terminal" deb nomlangan ilmiy ixtiro ishi-ga xalqaro patentni qo'lga kiritgan. "Optik tarmoqlarda axborot xavfsizligi" nomli monografiya hamda "Avtomatik boshqarish texnikasiga kirish" uslubiy qo'llanmalarini mazkur yo'nalishda ta'lim olayotgan tengdoshlari uchun qulay dastur bo'lib xizmat qilmoqda.

Bugunga qadar 5 ta maktabning veb-sayti, 40 dan ortiq robototexnik qurilmalar, 15 dan ortiq dasturiy vositalar yaratuvchisi hamda 3 ta yirik innovatsion loyiha, 21 ta innovatsion targ'ibot loyihasi, 20 ta innovatsion qurilma loyihalarning mualliflik huquqiga ham ega.

Dilnoza TOSHEMIROVA tayyorladi



IMKONIYAT

NODAVLAT TA'LIM MUASSASALARIDA O'QISH UCHUN IMTIYOZLAR



Prezidentimizning 2018-yil 5-apreldagi "Maktabgacha ta'lim tizimini yanada rag'batlantirish va rivojlantirish chora-tadbirlari to'g'risida"gi qarorida nodavlat ta'lim muassasalarida ta'lim olish uchun bir qator imtiyozlar belgilangan. Jumladan, davlat-xususiy sherikchiligi shartlarida tashkil etilgan nodavlat maktabgacha ta'lim tashkilotlari:

- tashkil qilinayotgan nodavlat maktabgacha ta'lim tashkilotlarining ehtiyojlari uchun o'rnatilgan tartibda tasdiqlangan ro'yxatlar bo'yicha olib kelinadigan uskunalar, asbob-anjomlar, o'quv qurollari va o'yingohlar davlat-xususiy sherikchiligi to'g'risidagi bitim tuzilgan kundan boshlab 2 yil muddatga bojxona to'lovlari (bojxonada rasmiylashtirish uchun yig'imlardan tashqari) to'lashdan ozod qilinadi;

- nodavlat maktabgacha ta'lim tashkiloti o'z faoliyatini amalga oshira boshlagandan keyin o'n yil

mobaynida barcha turdagi soliqlar va davlat maqsadli jamg'armalari-ga majburiy ajratmalar to'lamaydi;

- ko'rsatilgan soliq va bojxona imtiyozlari maktabgacha ta'lim sohasida ko'rsatilayotgan xizmatlaridan oladigan sof tushum ulushi umumiy realizatsiya hajmida hisobot (soliq) davri yakunlariga ko'ra kamida 80 foizni tashkil etadigan nodavlat maktabgacha ta'lim tashkilotlariga nisbatan qo'llaniladi.

Ikkinchidan, ijtimoiy ko'makka muhtoj oilalar farzandlari va maxsus kontingentdan muayyan miqdordagi tarbiyalanuvchilarni o'qitish, ular uchun ota-onalar to'lovining imtiyozli miqdorlari belgilanadi va ular ustuvor ravishda o'qishga qabul qilinadi.

Imtiyozni taqdim etish tartibi va muddatlari:

Mazkur imtiyozdan foydalanish uchun nodavlat maktabgacha ta'lim tashkilotlari mahalliy davlat soliq xizmati organlariga va vakolatli bojxona organlariga davlat-xu-

susiy sherikchiligi to'g'risidagi bitim tuzganligi va maktabgacha ta'lim sohasida xizmatlaridan oladigan sof tushum ulushi umumiy realizatsiya hajmida soliq hisoboti davri yakunlariga ko'ra kamida 80 foizni tashkil etganligini tasdiqlovchi hujjatlarni taqdim etishi lozim.

Ijtimoiy ko'makka muhtoj oilalar esa farzandlarini ustuvor ravishda o'qishga qabul qilish va ota-onalar to'lovining imtiyozli miqdoridan foydalanish uchun fuqarolarning o'zini o'zi boshqarish organlari va tegishli hududiy sektorlar rahbarlariga murojaat qilishlari, jumladan, "Temir daftar", "Ayollar daftari" yoki "Yoshlar daftari"da qayd etishni so'rashlari mumkin.

Mazkur imtiyozlardan foydalanish uchun nomzodlarning yoshi chegaralanmagan. Imtiyozni qo'llash bo'yicha murojaatlar "Jismoniy va yuridik shaxslarning murojaatlari to'g'risida"gi qonunida belgilangan muddatlarda ko'rib chiqiladi.

TOZALIK UCHUN ENG KAM OYLIK

OBODONLASHTIRISH XODIMLARI BILAN BIR KUN

Ovqatlanish uchun yemakxonaga yoki mehmonga taklif etilganda birinchi bo'lib e'tiborimizni tortadigan jihat bu – tozalik! Va bu mutlaqo tabiiy, ilk taassurot tashqi ko'rinishga qarab paydo bo'lganidek, batartib va ozoda joyda insonlar o'zlarini yaxshi his qiladi.

O'ylab ko'rilsa, kunimizning katta qismi ko'chada o'tadi: ishga, o'qishga boramiz. Ma'lum manzil sari otlar ekanamiz, hammamiz ham ishlarimizni oson va tez bitirib qaytishni niyat qilamiz. Biroq o'zimiz ba'zan bilib, ba'zan bilmagan holda boshqalar uchun qo'shimcha, aniqrog'i, ortiqcha ish "orttiramiz".

To'g'ri, bu ularning ishi, shuning uchun davlat byudjetidan maosh oladi, ammo ko'cha faqat ularniki emas-ku?! Nega endi tozalikka faqat ular rioya qilishi, biz tashlagan yelim idish va boshqa qog'oz-qiyim chiqindilarni ular yig'ib yurishi kerak?! Shu chiqindini duch kelgan joyga emas, chiqindi qutisiga tashlasak, asakamiz ketib qoladimi? Toza ko'chalardan yurishimiz, musaffo havodan nafas olishimiz ortida kimlarning mashaqqatli mehnati yotibdi? Bugun ularsiz bir kun ham o'tmaydigan, ham mehnat qilib, ham savob olayotgan tozalik navkarlari – obodonlashtirish xodimlari hayotiga nazar tashlaymiz!



JARIMALAR HAQIDA BILASIZMI?

Qator rivojlangan davlatlarda ko'chalar ozodaligiga putur yetkazuvchilarga qat'iy javobgarlik va katta miqdorda jarimalar belgilangan! Masalan, **Singapurda ko'cha tozaligiga mas'ul maxsus nazoratchilar sigaret qoldig'i yoki shirinlik qog'ozini ko'chaga tashlab ketayotganingizni ko'rib qolishsa, birinchi marta 300 dollar jarimaga tortilasiz.** Agar shunda ham to'g'ri xulosa chiqarmasdan atrof-muhit tozaligiga

zarar yetkazishda davom etsangiz, jarima miqdori har safar bir necha barobarga oshib borishi, hatto ming dollarga yetishi, undan ham yomon doimiy ravishda axlat terib yurishga majburlanishingiz mumkin.

Xorijda nafaqat ko'cha tozaligi, balki unga javobgar shaxslarning mehnati ham qadrlanadi. Masalan, Pekin ko'chalari tozalik xodimlari oylik maoshi bilan oilasini to'liq ta'minlashi va hatto jamg'arib, mashina olishi mumkin.

“

TOSHKENT SHAHAR OBODONLASHTIRISH BOSHQARMASIDAN USHBU MUAMMOGA E'TIBOR QARATISHLARINI SO'RAB QOLAMIZ



TOZALIK XODIMINING MAOSHI QANCHA?

2022-yil holatiga mamlakatimizda o'rtacha nominal oylik ish haqi 3,4 million so'mni tashkil etayotgani haqida Statistika qo'mitasi xabar qilmoqda. Bank, sug'urta, lizing, kredit, axborot va aloqa sohalari esa eng yuqori o'rtacha oylik ish haqi 6,5–8,4 million so'mni tashkil etmoqda. Shu o'rinda, atrof-muhitni chinnidek tozalab yurgan obodonlashtirish xodimlarining ish haqi bilan ham qiziqdim.

Bu "qora" ishlarni qilishdan uyalmay, shirinlik gulqog'ozini yoki ichimlik idishini behijolat uloqtirib ketgan vaqtimiz, bittalab terib olgani, supirib-sidirgani evaziga beriladigan ish haqining o'rtachasi emas, eng yuqorisi **1 million 600 ming so'mni tashkil etmoqda.**

Yuqorida sanab o'tilgan soha vakillarining o'rtacha maoshi ularning

bir necha oylik mehnat haqiga teng ekan. Xo'sh, **ularga mehnatini oqlaydigan, rag'bat bera oladigan ish haqi to'lansa, nima bo'ladi?** Ular ham mehnatiga yarasha haq olishi mumkin-ku? To'g'ri, balki o'z vaqtida oliy ta'lim olmagandir, ammo og'ir va eng muhimi, halol mehnat qilmoqda-ku.

Turli davlat idora va tashkilotlari, yetakchi sohalarning eng "yuqori" kursida o'tirgan ayrim amaldorlar o'zining mo'may maoshiga qanoat qilmay, poralarni cho'ntagiga joylayotgan vaqtda, 2 million so'm bilan oilasining bir oylik xarajatini qoplab o'tirgan oila boshlig'ini ko'z o'ngingizga keltiring-al! U boriga qanoat qilishga rozi, ammo bozorda oddiy qolipli non 2700 so'm bo'lib turgan hozirgi davrda yaxshiroq yashash haqida xayol surish ham qizg'ini va shu bilan birga achinarli ko'rindadi!

I-BRIGADA – KONTEYNERDA ISHLAYDI

Oylik maoshi qanchalik ko'p bo'lmasin, ish sharoiti juda katta ahamiyatga ega. Masalan, ish joyidagi ovqatlar saqlanadigan muzlatkich, sovitch, issiq va sovuq suv, hojtaxona kabilarsiz normal mehnat sharoitini tasavvur qilish qiyin. Ayniqsa, siz eng og'ir va mas'uliyatli ishni bajarayotgan xodim bo'lsangiz.

Balki, tasavvur etish qiyindir, biroq Toshkent shahar Obodonlashtirish boshqarmasining Yunusobod tumanidagi ayrim brigada xodimlari shu kabi sharoitlardan mahrum. Mustaqillik maydoni atrofidagi hududlar tozaligi uchun javobgar xodimlar orasida Toshkent viloyatining Parkent, Yuqorichirchiq, Yangiyo'l tumanlaridan ishga qatnaydiganlar ko'pchilikni tashkil etadi.

Texnika taraqqiy etgan davrda yashaymiz, biror yerga borish maqsadida ko'chaga chiqsangiz, metro yoki avtobus, eng kamida taksi topish muammo emas. Biroq "tekinga mushuk ham oftobga chiqmaganidek", viloyatdan shahar markazidagi ish joyiga borish uchun har kuni 20 ming so'm atrofida pul sarflashga to'g'ri keladi, shu bilan birga, ko'p farzandli yoki bemor parvarish qiladigan oila bekalar uchun ham o'sha-o'sha oylik ish haqi – 1 million 600 ming so'm!

"Pulni tejash maqsadida uyimizdan o'zimiz uchun ovqat olib kelamiz, ammo issiqni ko'rib turib, tushlik vaqti nari tursin, bir necha soat ichidayoq ovqat buzilib qolyapti. Uni yeb bo'lmaydi. Kichikroq bo'lsa ham muzlatkich bo'lganida shuncha narsa uvul bo'lmasdi", – deydi ulardan biri.

Xodimlar dam olishi va kiyim almashtirishi uchun yonma-yon joylashtirilgan ikkita konteynerning ayollar uchun ajratilganiga kirar ekanamiz, yuzimga ko'chadagi haroratdan bir necha barobar issiqroq havo urildi. **Hordiq chiqarish tugul, nafas olish muamмога aylangan bu "koshona" da har kuni 10 dan ortiq ayol xodimlar kiyim alishtirib, ovqatlanadi.** Yuz-qo'l yuvish uchun konteyner atrofida joylashgan idora va tashkilotlar ofisidan suv olib kelishadi. Endi hojtaxona masalasini tasavvur qilavering.

Yaqin atrofda ko'p qavatli uylarda istiqomat qiluvchi aholining ta'kidlashicha, boshqa tumanlardagi, hatto Yunusobod tumanidagi boshqa tozalik brigadalari uchun qisman yaxshi sharoitlar yaratib berilgan. Biroq aynan shu I-brigadaga kelganda sharoitlar eshigi yopilgan yoki tugab qolganidek.

Joy va yaxshi sharoit topish masalasida ham hududda istiqomat qiluvchi ayrim fuqarolar yaxshi takliflar berishdi. Masalan, uncha uzoq bo'lmagan hududdagi "O'zbekiston pochta" AJ "Toshkent pochta" filiali 17-aloqa bo'limi, xalq tili bilan aytganda, "pochtaxona" binosida bo'sh xonalar bor. U yerdagi sharoit konteynerlarga qaraganda, albatta, juda yaxshi ekani aniq.

"Yozda salqin, issiq va sovuq suv, hojtaxonasi bor. Boshqa sharoitlarni ham yaratsa bo'ladi. "Domkom"ga bir-ikki aytdim, shu binoning bit-ta xonasini bo'lsa ham tozalik xodimlariga ajratib berishsin, savob bo'ladi deb. Taklifimni ma'qullashdi, "beradigan bo'lishibdi" deb eshitdim-u, keyin yana tinchib ketdi", – deydi uylardan birida yashovchi befarq bo'lmagan onaxon.

Bu muammo hal qilinsa, nafaqat munosib mehnat sharoiti yaratilgan, balki tozaligimiz uchun javobgar bo'lgan insonlarga minnatdorchiilik ham bildirgan bo'lar edik. Toshkent shahar obodonlashtirish boshqarmasidan ushbu muammoga e'tibor qaratishlarini so'rab qolamiz va oylik maoshini ko'paytirish masalasiga ham jiddiy qarash vaqti yetganini eslatmoqchimiz. Agar ish haqlari oshirilsa, erta sahardan kech shomgacha tinim bilmaydigan xodimlar dam olish vaqtida ham qo'shimcha mablag' to'plash uchun yelim idishlarni yig'ib sotish yoki ko'p qavatli uylar podyezdi tozalab berishni emas, hordiq chiqarishni o'ylasharmidi, balki?!

Ziyoda RAHIMBOYEVA

tayyorladi.

G'OLIB ANIQLANDI!

Loyiha muallifi
Ziyoda RAHIMBOYEVA



Yoshlarni boy tariximiz bilan yaqindan tanishtirish va muzey sayohatlariga jalb etish maqsadida tashkil etilgan "Muzei va yoshlar" loyihasining ikkinchi soni e'tiboringizga havola etilgan edi. Belgilangan muddat ichida faollik ko'rsatgan ishtirokchilar orasidan g'olibni aniqladik! U O'zbekiston jurnalistika va ommaviy kommunikatsiyalar universiteti talabasi Musurmonova Xolida Alisher qizi. Quyida uning qiziqarli taqrizi va fotolari bilan tanishishingiz mumkin. Shuningdek, faol ishtirok etganlari uchun Farrux Berdiyev, Shahnoz Arslonov, Gulmira Xo'jayevaga tashakkur aytamiz!

"Ko'nglimga qil sig'masa qishloqni sog'inishim rost. Shunday payt men hali chegarasini bilmaydigan qirlarim-u, turli jonivorlar makoni bo'lgan tutzor (afsus, u hozir yo'q) ko'z oldimdan o'tadi. Shu bois "Yoshlar ovozi" gazetasida e'lon qilingan loyihada ishtirok etish maqsadida tabiat muzeyiga bordim. U yerdagi qushlarni ko'rib tutzor ichida opam bilan qirg'ovul quvgan bolaligim yodimga tushdi. O'shanda oyoq-qo'li chaqqon qirg'ovullarning hatto dumidan ham tuta olmaganim. Mag'lubiyat ta'mi achchiq ekanini his qilgandim shu lahza. O'zbekiston davlat muzeyida esa ularni juda yaqindan tomosha qildim: vazni 1,2-2,3 kilogram keladigan bur-

gut, "Oqqush ko'l" baletidagi nozik qizlarni eslatuvchi turna va bolalikni eslatuvchi qirg'ovul...

Burgutning o'tkir timoqlari orasida turgan baliq menga yashash mashaqqatini yodga soldi. 1918-yilda A.A.Mel tomonidan muzeyga in'om qilingan 1290 ta namunalardan iborat bo'lgan tropik kapalaklar kolleksiyasini ko'rib, lahzalik umrida go'zallikka intiluvchi hasharotlarning qanotlariga havas qildim. To'g'ri, ular tirik emas, lekin haliyam go'zallik ulashmoqda. Pitekanthrop, sinantrop, neandertal, kromanyon kabi ilk odam ajdodlarining tosh haykalchalari ibtidoni yodga solsa, muzlatilgan inson organizmlari intihoni eslatib turadi.

Muzeyni tomosha qilgani kelgan bolajonlarning nigoqidagi hayrat menga ko'chdi. Bu bo'limga kirib, qimmatbaho toshlardan topgan zavqimni ham unutdim. Bir ko'zli qo'zichoqning yagona ko'ziga boqib o'zimga ongli mavjudot - inson ekanligimdan uyaldim. Tabiat - hammamizning ildizimiz. Qirg'ovulni tuta olmaganim alami endi menda yo'q. Agar ularni yaqindan tomosha qilishim mening g'alabam bo'lsa, men bu zavqdan voz kechaman. Nigohi-la yig'layotgan embrionga qarab inson kuch-qudratiga mahliyo ham bo'lolmayman. Tabiat muzeyi tabiatni tanitish uchun emas, o'zligimizni anglash uchun xizmat qiladi, menimcha!"

Xolida MUSURMONOVA,
loyiha g'olibi



SINMAGAN HAQIQAT

Mansur Raxmanov 2001-yili Ichki ishlar vazirligi Akademiyasini bitirdi. Oliy ta'lim olgan har bir talaba yuksak orzular bilan yaxshi ish joylarida ishlashni xohlaydi. Shu maqsadda u Yangibozor tumani Ichki ishlar bo'limi jinoyat qidiruv va uyushgan jinoyatchilikka qarshi kurashish bo'linmasi tezkor vakili sifatida ish faoliyatini boshladi. Keyinchalik katta tezkor vakili, Xorazm viloyat IIB JQ va TQKB katta tezkor vakili lavozimlarida ishladi.

2009

-yil fevral oyida sobiq xavfsizlik xizmatining viloyat boshqarmasi xodimlari tomonidan Mansur Raxmanovga nisbatan turli yolg'on va tuhmatdan iborat uydirmalar to'planib, jinoyat ishi qo'zg'atildi. Oqibatda Yangibozor tuman IIB va Xorazm viloyat IIB kadrlar boshqarmasi rahbariyati undan "o'z xohishi bilan" ishdan ketish yuzasidan bildirgi yozib berishini qat'iy talab qildi.

Biroq Xorazm viloyati tomonidan xizmat tekshiruv o'tkazilganda Mansur Raxmanov noqonuniy harakat sodir etmaganligi o'z tasdig'ini topadi. Jinoyat-prosessual kodeksining 88-moddasi talablariga zid ravishda ko'rsatmalar to'plangan oshkor bo'lgach ham Xorazm viloyat IIB rahbariyati Mansur Raxmanovdan ruhiy bosim ostida ishdan ketish haqida bildirgi yozib berishini talab qilgan.

Mansur Raxmanov bunga rozi bo'lmagach kadrlar boshqarmasi "bildirgi sanasini qo'ymasdan yozib, ishlab yuraver, bu bildirgi sanasiz qonuniy kuchga ega bo'lmaydi, senga hukm chiqarilsagina ishdan bo'shatamiz" degan mazmunda tushuntirish bergan. Shundan so'ng Mansur Raxmanov sanasini ko'rsatmay, o'z ixtiyori bilan ishdan bo'shatish to'g'risida bildirgi yozib berib, Yangibozor tuman IIB jinoyat qidiruv va uyushgan jinoyatchilikka qarshi kurashish bo'linmasi katta tezkor vakili sifatida ishini davom ettirib kelgan.

Afsuski, u 2009-yil o'rtalarida MXX xodimlarining noqonuniy xatti-harakatlari oqibatida jinoyat ishlari bo'yicha Urganch shahar sudi tomonidan Jinoyat ko-

deksining turli moddalari bilan ayblanib, sudlangach ishdan ketishga majbur bo'lgan. Sudga qayta shikoyat bilan murojaat qilganligi natijasida 2021-yil 10-sentabr kuni to'liq oqlandi.

Ishdan asossiz ravishda bo'shatilganligi yuzasidan Xorazm viloyat IIB va Ichki ishlar vazirligiga bir necha marotaba murojaat qilgan. Biroq to'liq reabilitatsiya qilinib, oqlangan bo'lishiga qaramay, viloyat IIBga qayta ishga qabul qilish bo'yicha murojaatiga rad javobi beriladi.

Shundan so'ng sudga murojaat etgan Raxmanov Mansur Jumaboyevich Xorazm viloyat IIBning 2009-yil 12-martdagi 15-sonli buyrug'ini g'ayriqonuniy deb topib, o'zini avvalgi ishga tiklashni so'rab tushuntirish berdi. Sud taraflarning tushuntirish va muzokaralarini eshitib, ish hujjatlaridagi dalillar va sud majlisida aniqlangan holatlarni tahlil qilib, da'vogarning talabini asosli deb topdi. Chunki da'vogarni xizmatdan bo'shatishda ish beruvchi mehnat qonunchiligi talablariga rioya qilmagan.

Xalqimizda haqiqat egiladi, bukiyadi, lekin sinmaydi degan naql bor. Nihoyat Mansur Raxmanovning bag'riga haqiqat shamoli tegib, 2009-yil 12-martdan Yangibozor tuman Ichki ishlar bo'limi jinoyat qidiruv va uyushgan jinoyatchilikka qarshi kurashish bo'linmasi katta tezkor vakili lavozimiga ishga tiklandi.

Bezod RAJABOV,

Fuqarolik ishlari bo'yicha
Urganch tumanlararo sudining sudyasi

HIND
TILINI
ORTDA
QOLDIRDIK

WIKI
STIPENDIYA

"WikiStipendiya" marafoni start olganidan so'ng o'zbek tilidagi maqolalar soni 155 mingdan oshdi va o'zbekcha Wikipedia 316 ta tilli reytingda 57-o'ringa chiqdi.

Quvonarli tomoni, o'zbek tilida sozlashuvchilar soni 25 million, hind tilining esa 592 million sozlashuvchisi bor. Ammo "wikistipendiya" yachilarimiz hind tilini ham ortda qoldirdi.

Shahribonu
RAHMATOVA

“WIKISTIPENDIYA”

“BIZNING YOSH IJODKORLAR”

Loyiha muallifi

Shahribonu RAHMATOVA


Gazetamizning so'nggi sahifasida e'lon qilinayotgan "Bizning yosh ijodkorlar" loyihasining 4-soni havola etilmoqda. San'at yo'nalishlari va ijodkorlar bilan tanishish zavqli, albatta. Kuzating, his eting va o'zingizni shu yo'nalishlarda sinab ko'ring!



Bu galgi qahramonimiz dastgohli va mahobatli rangtasvir yo'nalishlarini o'z bo'yog'i bilan yuksaltirayotgan yosh rassom – Tursunmurod Musirmonov.

U san'atga bolaligidan mehr qo'ygan. 2010-yildan buyon tasviriy san'at bilan muntazam shug'ullandi. Respublika rassomlik kolleji hamda Kamoliddin Behzod nomidagi Milliy rassomlik va dizayn institutining amaliy san'at va dizayn fakultetida tahsil olgan.

Ijodga ilk qadam qo'yganidan to shu kunga qadar turli festival, ko'rik-tanlov va ko'rgazmalarda ishtirok etib, faxrlansa arzigulik yutuqlarga erishdi. Birgina 2021-yilning o'zida jahon miqyosidagi "New York Art International Competition The American-European Holding in Culture and Arts New York, United States of America" tomonidan tashkil qilingan tanlovda, Valensiya shahrida tashkil etilgan "Valensiya oltini", Ispaniyada o'tkazilgan "Dali's Mustache, International Art Contest", Kann shahrida o'tkazilgan san'at tanlovlari ijodiy ishlari bilan munosib qatnashib, diplom, medal va kuboklarni qo'lga kiritgan. Davlatimiz tomonidan uning yutuqlari be'etibor qoldirilmadi – Kamoliddin Behzod nomidagi davlat stipendiyasi, "Mard o'g'lon" ko'krak nishoni sohibiga aylandi.



"Yoshlar har qanday jamiyatning kelajagini belgilab beruvchi muhim strategik kuch hisoblanadi. O'zbekiston – yoshlar eng ko'p yashaydigan mamlakatlardan biri. Bizning zimmamizda esa yaratib berilayotgan imkoniyatlardan samarali va unumli foydalanish mas'uliyati bor. Shuni aytishim joizki, jahon miqyosidagi har qanday ko'rgazma-tanlov o'zbek yoshlarisiz o'tmaydi, men ham o'zbek tasviriy san'ati qay darajada yuksak ekanini isbotlashga harakat qilyapman", – deydi Tursunmurod.

YOSHLAR OVOZI

Bosh muharrir:
Hamza
ABDULLAYEV

Muassis:
O'zbekiston yoshlar ittifoqi
Markaziy Kengashi

Bosh hamkor:
O'zbekiston Respublikasi
Yoshlar ishlari agentligi

Navbatchi muharrir:
Sardor
SA'DULLAYEV

Musahhihlar:
Rashid XO'JAMOV,
Qirmizoy HAKIMOVA

Gazeta O'zbekiston Respublikasi Prezidenti Administratsiyasi huzuridagi Axborot va ommaviy kommunikatsiyalar agentligida 2020-yil 19-dekabrda № 0242 raqamini bilan qayta ro'yvatdan o'tgan. Gazeta materiallari tahririyat kompyuter markazida teriladi va saqlanadi. Tahririyat manzili: 100083, Toshkent, Matbuotchilar ko'chasi, 32. Telefonlar: (71) 233-22-16, (71) 236-79-95.

"Shara" nashriyat-matbaa aksiyadorlik kompaniyasi bosmaxonasida, A-3 formatda chop etildi. Hajmi – 2 bosma taboq. Korxonada manzili: Buyuk Turon ko'chasi, 41. Indekslar: 203, 3203. Bahosi kelishilgan narxda. Buyurtma – G-755, Adadi – 10598. Boshiga topshirish vaqti – 21.00. Topshirildi – 20.00.

Saytimizga o'tish uchun QR-kodni telefoningiz orqali skaner qiling.



1 2 3 4 5 6